

Nant' à e Labbre

Ch'avemu nant' à e labbre ?

Solu u silenziu avemu

Parolle ritenute

Da e vergogne sceme

Quandu ci vuleria

Ci vuleria invece

À dì ciò chì ci piglia

À dì ciò chì ci impreme.

Ch'avemu nant' à a bocca ?

Troppu sempre acqua in bocca

È per quanti mutivi

Ci ne firmemu privi

Di parolla cappiata

Tonta, innamorata

Persa da rigalà si

Anima, core è carne.

Ch'avemu nant' à a bocca ?

Un ditu à tocca tocca

Pè dì ci lu ricusu

Postu chì ùn hè l'usu

Attenti, femu pianu

Per andà sempre sanu

È tandu à ùn dì più

Luntanu ùn si và più.

Nant' una bocca, sai

Ci vole à inventà

E parolle chì mai

Duvianu parlà

A voglia, a brama, u tene

È ciò chì ùn cunvene

Ci vole à dì

Cum'ellu si basgia
Ogni parolla brasgia
Ogni smisura pensa
Chì scatena i sensi

Nant'una bocca, sai
Da l'ombra à u parlà
U bellu da assaghjà
Hè ciò chì hà lu gustu
Di ogni palisà.